

lis Gnovis

MANZAN. Il balon al devente lengaç di identitât e di amicizie

La Associazion Sportive Furlane (Asf), in colaborazion cul Comun di Manzan e la Ssd Manzanese Calcio, e inmanee la sfide amichevule internazionâl tra la Selezion di balon dal Friûl e la Nazionâl de Groenlande. L'incuintri al sarà domenie ai 31 di Mai, aes 6 sore sere, li dal Stadi Comunâl di Manzan in vie Olivo 8. L'avigniment al rapresente un moment storic pal sport furlan, puartant tal nestri teritori une scuadre di balon che e à un incjant unic come chê groenlandese, intun confront che al va parsore di ce che al è dome il risultât agonistic. «La iniziative che la nestre Associazion e je daûr a promovî, di là de grande impuartance sportive, si cjame di un valôr simbolic e civil profont – al dis il president de Asf, Daniele Puntel –. Intun moment storic globâl là che si manifestin cun prepotence tindincis al conflit che a someavin aromai distudadis, la Asf e vûl tornâ a afermâ, cul lengaç universâl dal balon, il dirit inalienabil ae autodeterminazion dai popui. Viodi la nestre selezion a confrontâsi cun chê groenlandese, al vûl di dà vòs a cui che al riclame la sô identitât tal rispiet di chei altris e te fradilance tra lis nazions».

TARCINT. Inteligence artificiâl, incuintri cun Serra

A Tarcint, vinars ai 22 di Mai aes 6.30 sot sere, li de Sale Margherita in vie Marinelli, al è in program l'incuintri "Cosa farò di grande? Crescere con l'Intelligenza artificiale: passato, presente e prospettive future" cun tant che relator Giuseppe Serra (te foto), diretôr dal Laboratori di Inteligence artificiâl de Universitât dal Friûl. L'apontament al è inmaneât de Scuole paritarie bons. Camillo Di Gaspero di Tarcint, in ocasion dal 50m de fondazion, adun cu la Plêf arcipretâl Sant Pieri apuestul di Tarcint e il patrocini dal Comun.



TISANE. E torne la corse "Timent Run 10K"



Domenie ai 24 di Mai a Tisane e torne la "Timent Run 10K", la corse su la distance di 10 chilometri che dal 2020 e à l'obietif di valorizâ il teritori bagnât di chel che al è stât definit tant che l'ultin flum salvadi de Europe. Inmaneât dal Athletic Club Apicilia, l'event -cun partence aes 9.00 di place Indipendenza- al propon un percors gnûf rispiet aes edizions passadis. Cun di fat, si corarà dilunc un anel di 5 chilometri, di fâ par dôs voltis, dut tal teritori comunâl di Tisane, tocjant ancje la frazion di Tisanote. La edizion 2026 e previôt cun di plui la Timentina Run 5K, une corse a caratar no agonistic, vierte a duç, che e tacarà cualchi minût dopo de prove competitive. Testimonial de manifestazion al sarà Stefano Scaini, ex azzurro par dôs voltis campion juniores te corse in montagne (2001 e 2002) e bronç tai Europeans di categorie di corse tai çjamps (2001). Ae gare di 10 chilometri e je za confermada la presince di Silvia Furlani, la corridore furlane che e je tibiade de sclerosi multiple di plui di 30 agns, che e puarte tes garis in ogni bande de Italie il so messaç di fuerce, otimisim e resistance ae malatie.

Miercus 20	S. Bernardin di Siene	Domenie 24	Lis Pentecostis
Joibe 21	S. te Gjisele	Lunis 25	Sante Vergjine Marie
Vinars 22	S.te Rite di Cassie	Martars 26	S. Filip Neri
Sabide 23	S. Desideri	Il timp	Bielis zornadis.



Il soreli
Ai 20 al jeve aes 5.29
e al va a mont aes 20.38.



La lune
Ai 23 Prin quart.

Il proverbi
Il sparagn al è il prin vuadagn.
Lis voris dal mès
Prontait sostegns in len, plastiche o metal
par cudumars, pomodoros, fasûi rampighins,
favis, pevarons, cucins.

Concors par tescj teatrâi e contis sul taramot

Un concurs par selezionâ tescj teatrâi in lenghe furlane e, in maniere dal dut straordenarie, par dà vite a une racuelte di contis curtis te suaze dal progiert "No smenteâ". A son i doi progierts puartâts indevant de Associazion teatrâl furlane (Atf), adun cul Ent Friûl tal Mont e la Societât Filologjiche Furlane e cu la poie de ARLeF, la Agenzie regionâl pe lenghe furlane, cun chê di valorizâ a ogni nivel il teatri furlan, la culture e la marilenghe. Il Concors, rivât ae edizion numar 14 (al è bienâl) -che te edizion ultime al veve tirât dongje adiriture 23 copions, di chescj cuatri za lâts in sene e trê rivâts dai Fogolârs Furlans - al è riservât al gjenar 'comédie' - brillante, ironiche cuntune biele fin - pes categoriis 'monolics' (cun tescj che no àn di passâ lis 1.000 peraulis), 'curts teatrâi' (senis curtis o ats unics cuntune lungjece massime di 8 pagjinis) e 'tescj teatrâi complets' (cun 45 pagjinis al massim). Ducj i componiments a àn di jessi ineditis, mai publicâts, mai premiâts e nancje proponûts sul palc. La iniziative e je vierte a duç, ançje ai corejonâi che a son a stâ tal forest, baste che a vedin almancl 18 agns. Lis iscrizions al concurs a son za viertis e si sieran ai 31 di Avost, biel che pe spedizion des oparis al è timp fintremai ai 31 di Dicembar. «In cheste edizion o vin pontât su la comédie cun teme libar cul invît a mandâ tescj divertents e lizêrs - al dis il president di Atf, **Guido Covazzi** -; lis oparis finalistis, selezionadis di une jurie a saran votadis des compagniis teatrâls associadis ae Atf, intant che la serade finâl dal Concors e je previodude pal mès di Avrîl dal an che al ven».

Chest an, dongje de "gare", in ocasion dal 50m aniversari dal taramot, e ven proponude une racuelte di contis cun



Il laboratori a pene finît "Peraulis in sene!", par cure di Giulia Tollis, inmaneât pai iscritti al concurs

La iniziative de Associazion teatrâl furlane, rivade ae edizion numar 14, e je vierte a duç. I componiments a àn di jessi in lenghe furlane

titul "No smenteâ", vâl a di tescj naratîfs curts e ineditis (che no passedin i trê mil caratars gjavant vie i spazis), scrits memoreant il taramot dai 6 di Mai dal 1976. «A puedin jessi mandâts no dome de bande di cui che al à vivût la tragjedie in prime persone - al sclârîs Covazzi -, ma ançje di cui che 'ndi à sintût fevelâ, di cui che si cjatave fûr region. Dongje des testimoniancis - al zonte - a son acetadis ançje contis di fantasia, baste che a sedin simpri leadis al sisme di cincuant agns indaûr». La idee e je chê di tirâ dongje i tescj e di metiju adun intune specifiche racuelte su cjarte par leturis senichis che e podarà jessi ançje pandude traviers dai canâi digitâi, cu lis oparis che tal avignî a saran presentadis tant

che introduzion ai putrops spetacui teatrâi, par cure de Atf. Par inviâ lis contis al è timp fin ai 15 di Setembar. Te suaze dal progiert, in Setembar - in maniere di ufrî ocasion di formazion a gratis par cui che al vûl misurâsi te composizion di tescj teatrâi par furlan - al tacarà un cors in linie di scritture creative cun titul "Scrif Scrif! Scrif!", biel che al è a pene finît "Peraulis in sene", cors sui metodis di svicinament ae sene tacant di un copion o di un scrit teatrâl, par cure de associazion "Servi di Scena-Matearium". Sul sit de Atf - www.associazion-teatralefrilana.com - si puedin cjatâ dutis lis informazions e il regolament dal concurs e de racuelte straordenarie "No smenteâ!".

Monika Pascolo

Codroip. Jessi (bogns) gjenitôrs, incuintri

Te suaze dal cicli di conferencis su lis tematchis de educazion, dal lengaç e dal jessi gjenitôrs, joibe ai 21 di Mai aes 8.30 sore sere li dal Auditorium comunâl in vie IV Novembre 33 a Codroip al è in calendari l'incuintri "Per essere (buoni) genitori", cul psicologic e psicoterapeut Osvaldo Poli, che al vuiderà cui che al sarà presint ae riflessione su erôs educatîfs, caratars difici e sens di colpe. La jentrade al event - inmaneât dal Assessorât ae Culture dal Comun di Codroip, in colaborazion cu la associazion "EduchE" - e je libare e sore nuie.

Peraulis in dismentie

par cure di Mario Martinis

> GLÏR

s.m. = ghiro
(dal latino glis 'ghiro')
Ce svelto chel glîr!
Che svelto quel ghiro!

> GLOVE

s.f. = inforcatura, diramazione, ramificazione; tronco forcuta piantato in terra (per ferrare il bovino); mazza forcuta e dentata (per il latte cagliato)
(dalla voce germanica globa 'ramo biforcuto')
La poiane e à fat il nît propit su la glove dal olm.
La poiana ha fatto il nido proprio sulla diramazione dell'olmo.

> GLUTIDÔR

s.m. = esofago
(dal verbo glutire)
Ce mâl tal glutidôr, puedistu preparâmi alc di cjalt?
Che dolore all'esofago, puoi preparami qualcosa di caldo?
"Passât el glutidôr, nol sa di nissun savôr" (prov. O 190)

> GNAULÂ

v. = miagolare, gnaulare; (in senso esteso) frignare
(voce onomatopeica imitante il verso del gatto)
Se tu âs di gnaulâ dut il timp, al è miôr che ogni tant tu vuachis.
Se devi miagolare tutto il tempo, è meglio che ogni tanto abba.

> GNEUR (JEUR)

s.m. = lepre (verosimilmente continua il latino nervilos 'forza, energia, vigore')
Îr to pari al è tornât de cjace cuntun gneur.
Ieri tuo padre è tornato dalla caccia con una lepre.

> GNUCHE

s.f. = nuca, occipite; capacità, ingegno (dal basso latino nucha 'filo delle reni', dall'arabo nukha 'midollo spinale, schiena')
Il picul mi cjape tantis di chês pachis te gnuche.
Il piccolo mi prende tante di quelle botte sulla nuca.
E à la gnuche, ma no si impegne.
Ce l'ha la capacità, ma non si impegna.